




𠄎

𠄎

𠄎



此鮑集與讀未見書齋所藏
毛氏影宋本同第二卷缺古
兩半葉予後被補寫入主人
將以歸綬塔、其寶之

庚申九月

洵菴記

鮑照集序



散騎侍郎虞炎奉教撰



鮑照字明遠本上黨人家世貧賤少有文
思宋臨川王愛其才以為國侍郎王薨始
興王濬又引為侍郎孝武初除海虞令遷
太學博士兼中書舍人一本云時上多忌以文自
高趨侍左右深達風旨以
此賦述不復出為秣陵令又轉永嘉令大明
五年除前軍行參軍侍臨海王鎮荊州掌
知內命尋遷前軍刑獄參軍事宋明帝初
江外拒命及義嘉敗荆土震擾江陵人宋

景因亂掠城為景所殺時年五十餘身既
遇難篇章無遺流遷人間者往往見在儲
皇博採羣言遊好文藝片辭隻韻罔不收
集照所賦述雖乏精典而有超麗爰命陪
趨備加研訪年代稍遠零落者多今所存
者儻能半焉

鮑氏集卷第一

舞鶴賦

蕪城賦

芙蓉賦

遊思賦

飛蛾賦

舞鶴賦

散幽經以驗物偉胎化之仙禽鍾浮曠之
藻質抱清迥之明心指蓬壺而翻翰望崑
閬而揚音匝日域以迴驚窮天步而高尋
踐神區其既遠積靈祀而方多精含丹而
星耀頂凝紫而烟華引圓吭之纖婉頰脩
趾之鴻媵壘霜毛而弄影振玉羽而臨霞
朝戲於芝田夕飲乎瑤池馱江海而遊澤

掩雲羅而見羈去帝鄉之岑寂歸人寰之
喧卑歲崢嶸而催暮心惆悵而哀離於是
窮陰殺節急景凋年涼沙振野箕風動天
巖巖苦霧皎皎悲泉冰塞長河雪滿羣山
既而零昏夜歇景物澄廓星翻漢回曉月
將落感寒雞之早晨憐霜鴈之違漠臨驚
風之蕭條對流光之照灼唳清響於丹墀
舞容飛於金閣始連軒以鳳踰終宛轉而
龍躍躑躅徘徊振迅騰摧驚身蓬集矯翅
雪飛離網別赴合渚相依將與中止若往

而歸颺沓矜顧遷延遲暮逸翻後塵翺翥
先路拍會規翔臨歧矩步態有遺妍貌無
停趣奔機逗節角睐分形長揚揚一作翹緩驚
並翼連聲輕迹凌亂浮影交橫衆變繁姿
參差洊密煙交霧凝若無毛質風去雨還
不可談悉既散魂而盪目迷不知其所之
忽星離而雲羅整神容而自持仰天居之
崇絕更惆悵而驚思當是時也燕姬色沮
巴僮心恥巾拂兩停丸劍雙止雖邯鄲其
敢倫豈陽阿之能擬入衛國而乘軒出吳

都而傾市守馴養於千齡結長悲於萬里

蕪城賦

登廣陵城作

灞池平原南馳蒼梧漲海北走紫塞鴈門
拖以漕渠軸以崑崗重關複江之奧四會
五達之莊當昔全盛之時車掛轆人駕肩
屨閉撲地歌吹沸天孳貨鹽田鏟利銅山
才力雄富士馬精妍故能侈秦法侏周令
劃崇墉列濬洫圖脩世以休命是以板築
雉堞之殷井榦烽櫓之勤格高五嶽袤廣
三墳崒若斷岸轟似長雲製磁石以禦衝

糊頽壤以飛文觀基扃之固護將萬祀而
一君出入三代五百餘載竟小割而豆分
澤葵依井荒葛冒途壇羅虺蜮階闕麇廳
木魅山鬼野鼠城狐風嗥雨嘯昏見晨
趨飢鷹礪吻寒鴟嚇雛伏暴藏席乳血食
膚崩榛塞路崢嶸古馗白楊早落塞草前
哀稜稜霜氣款款風威孤蓬自振驚沙坐
飛灌莽杳而無際叢薄紛其相依通池既
已夷峻隅又已頽直視千里外唯見起黃
埃凝思寂聽心傷已摧若夫藻扃黼帳歌

堂舞閣之基璇淵碧樹弋林釣渚之館吳
蔡齊秦之聲魚龍爵馬之玩皆薰歇燼滅
光沉響絕東都妙姬南國佳人蕙心紈質
玉貌絳脣莫不埋魂幽石委骨窮塵豈憶
同輦之愉樂離宮之苦辛哉天道如何吞
恨者多抽琴命操爲蕪城之歌歌曰邊風
起兮城上寒井徑滅兮丘隴殘千齡兮萬
代共盡兮何言

芙蓉賦

感衣裳於楚賦詠憂思於陳詩訪羣英之

艷絕標高名於澤芝會春陂乎夕張摹芙
蓉而水嬉抽我衿之桂蘭點子吻之瑜辭
選羣芳之徽号抱茲性之清芬稟若華之
驚絕單蓋陽之妙手測滌池之光潔爍彤
輝之明媚粲雕霞之繁悅顧椒丘而非偶
豈園桃而能埒彪炳以蒨藻翠景而紅波
青房兮規接紫的兮圓羅樹妖遙之弱幹
散菡萏之輕荷上星光而倒景下龍鱗而
隱波戲錦鱗而夕暎曜繡羽以晨過結遊
童之湘吹起榜妾之江歌備日月之溫麗

非盛明而謂何若乃當融風之暄盪承暑
雨之平渥被瑤塘之周流繞金渠之屈曲
排積霧而揚芬鏡洞泉而含綠葉折水以
爲珠條集露而成玉潤蓬山之瓊膏輝蕊
河之銀燭冠五華於仙草超四照於靈木
雜衆姿於開卷閱羣兒於昏明無長袖之
容止信不笑之空城森紫葉以上擢紛湘
蘂而下傾根雖割而瑄徹柯既解而絲縈
感盛衰之可懷質始終而常清故其爲芳
也綢繆其爲媚也奔發對粧則色姝比蘭
則香越泛明綵於宵波飛澄華於曉月陋
荆姬之朱顏笑夏女之光髮恨狎世而貽
賤徒愛存而賞沒雖凌羣羊以擅竒終從歲
而零歇

遊思賦

雲徑兮海衝上潮兮送風秋水兮駕浦涼
煙兮冒江暮氣起兮遠岸黑陽精滅兮天
際紅波沄沄兮無底山森森兮萬重平隄
兮亘岸通川兮瀉壑仰盡兮天經俯窮兮
地絡望波際兮曇曇眺雲間兮灼灼乃江

之斷山信海上之飛鶴指煙霞而問鄉
覽林嶼而訪泊撫身事而識苦念親愛而
知樂苦與樂其何言悼人生之長後捨堂
宇之密親坐江潭而爲客對蕪葭之遂黃
視零露之方白鴻晨驚以響湍泉夜下而
鳴石結中洲之雲蘿託綿思於遙夕瞻荆
吳之遠山望邯鄲之長陌塞風馳于邊草
飛胡沙起于鴈揚翻雖燕越之異心在禽
鳥而同戚悵收情而收淚遣繁悲而自抑
此日中其幾時彼月滿而將蝕生無患於

不老奚引憂以自逼物因節以卷舒道與
運而升息賤賣卜以當壚隱我耕而子織
誠愛秦王之奇勇不類絕筋而稱力已矣
哉使豫章生而可知夫何異乎叢棘

飛蛾賦

仙鼠伺闇飛蛾候明均靈舛化詭欲齊生
觀齊生而欲詭各會性以憑方凌焦煙之
浮景赴熙焰之明光拔身幽草下畢命在
此堂本輕死以邀得雖糜爛其何傷豈學
山南之文豹避雲霧而品藏

鮑氏集卷第一

鮑氏集卷第二

尺蠖賦

觀漏賦

野鵝賦

傷逝賦

園葵賦

尺蠖賦

智哉尺蠖觀機而作申非向厚屈非向薄
當靜泉渟遇躁風驚起軒軀以曠跨伏累
氣而并形冰炭弗觸鋒刃歷迓逢嶮蹶躅

值夷舒步忌好退之見猜哀必進而爲蠹
每驤首以瞰途常佇景而翻路故身不豫
託地無前期動靜必觀於物消息各隨乎
時從方而應何慮何思是以軍筭慕其權
國容擬其變高賢圖之以隱淪智士以之
而藏見笑靈虵之久蟄羞龍德之方戰理
害道而爲尤事傷生而感賤苟見義而守
勇豈專取於弦箭

觀漏賦 并序

客有觀於漏者退而歎曰夫及遠者箭也

而定遠非箭之功爲生者我也而制生非
我之情故自箭而爲心不可憑者絃因生
以觀我不可恃者年憑其不可恃故以悲
哉况乎沉華密遠輕波潛耗而感神嬰慮
者又自外而傷壽以是思生生亦勤矣乃
爲賦云

佩流歎於馳年纓華思於奔月結蘭茗以
望楚弄參差以歌越撫凝肌於遷滯鑑雕
容於髣髴景有墜而易昏憂無方而難歇
歷玫階而升隩訪金壺之盈闕觀騰波之

吞寫視驚箭之登沒箭既沒而復登波長
瀉而弗歸注沉穴而海漏射懸塗而電飛
墜戶牖而知天掩雲霧而測暉創百齡於
纖隱積千里於空微彼崢崢而行溢此冉
冉而逾哀撫寸心而未改指分光而永違
昔傷矢之奔禽聞虛弦之顛仆徒嬰刃而
知懼豈潛機之能覺惟生經之霹靡亦悲
長而懽促橫證古而秉心抱空意其如玉
波沉沉而東注日滔滔而西屬落繁馨於
纖草殞豐華於喬木對吳離而後歌據窮

蹊而方哭雖接薪之更傳寧絕明之還續
貫古今而并念信寡易而多難時不留乎
激矢生乃急於走丸既河源之莫壅又吹
波而助瀾神怵迥而多慮心轉輾而甚歡
望天涯而佇念擢雄劍而長歎嗟生民之
永迷躬與後而皆恤死零落而無二生差
池之非一理幽分於化前算冥定於天秩
與艾骨而招病猶刳腸而興疾情殊用而
俱盡事離方而同失聊弭志以高歌順煙
雨而沉逸於是隨秋鴻而汎渚逐春鷺而

登梁進賦詩而展念退陳酒以排傷物不
可以兩大得無得而雙昌薰晚華而後落
槿早秀而前亡姑屏憂以愉思樂茲情於
寸光從江河之紆直委天地之圓方漏盈
兮漏虛長無絕兮芬芳

野鵝賦 并序

有獻野鵝於臨川王世子愍其樊繫命爲
之賦其辭曰

集陳之隼以自遠而稱神栖漢之雀乃出
幽而見珍此瓌禽其何取亦廁景而承仁

捨水澤之驩逸對鍾鼓之悲辛豈徇利而
輕命將感受而投身入長羅之逼脅恨高
緲之樊縈邈辭朋而別偶超煙鶩而風行
跨日月而遙逝忽瞻國而望城踐菲迹於
瑤塗昇弱羽於丹庭瞰東西之繡戶眺左
右之金扁貌纖殺而含愈一作恚悴心翻越而
慙驚若墜而墮谷况不知其所寧惟君囿
之珍麗實妙物之所殷翔海澤之輕鷗巢
天宿之鳴鶉鵠程材於梟猛翬薦體之雕
文既敷容以照景亦選翻以排雲雖居物

以成偶終在我以非羣望征雲而延悼顧
委翼而自傷無青雀之銜命之赤鴈之嘉
祥空穢君之園池徒慙君之稻梁顛引身
而剪迹抱末志而幽藏於是流歲遂遠慘
節方崇雲纏海岱風拂峻潼飛雲一作馳
霰飄沙舞蓬視清池之初涸望綠林之始
空立菰蒲之寒渚託隻影而爲雙宛拔喙
而掩眚悲結悵而滿胃處朝晝而雖念假
外見而遷排涉脩夜之長寂信專思而知
哀風稍稍而過樹月蒼蒼而照臺冰依岸

而早結霜託草而先摧斂雙翮於水裔翹
孤趾於林隈情無方而雨集事有限而星
乖在俄頃而猶悼矧窮生之所懷聞宿世
之高賢澤無微而不均育草木而明義愛
禽鳥而昭仁全殞卵而來鳳放乳麀而感
麟雖陋生於萬物若沙漠之一塵苟全軀
而畢命庶魂報以自申

傷逝賦

晨登南山望美中阿露團秋槿風卷寒蘿
悽愴傷心悲如之何盡若窮煙離君剪絃

如影滅地猶星殞天棄華宇於明世閉金
扃於下泉永山河以自畢眇千齡而弗旋
思一言於向時邈衆代於古年逝稍遠而
變體浸幽明而改時覽篇迹之如旦婉遺
意而在茲忽若謂其不然自惆悵而驚疑
循堂廡而下降歷幃戶而升基服委襟而
褫帶器蒙管而鞫絃志存業而遺績身先
物而長辭豈重歡而可覲追前感之無期
寒往暑來而不窮哀極樂反而有終燧已
遷而禮革月既逾而慶通心微微而就遠

跡離離而絕容白日藹而回陰閨館寂而
深重冀憑靈於前物佇美目乎房櫳徒望
思以永久邈歸來其何從結單心於暮條
掩行淚於晨風念沉悼而誰劇獨嬰哀於
逝躬草忌霜而逼秋人惡老而逼衰誠衰
耄之可忌或甘顛而志違彼一息之短景
乃累恨之長暉尋平生之好醜成黃塵之
是非將滅耶而尚在何有去而無歸惟桃
李之零落生有促而非夭觀龜鵠之千祀
年能富而情少反靈質於二塗亂感悅於

雙抱日月飄而不留命倏忽而誰保譬明
隙之在梁如風露之停草髮迎憂而送華
貌先悴而收藻共甘苦其幾人曾無得而
偕老拂埃琴而抽思啟陳書而遐討自古
來而有之夫何怨乎天道

園葵賦

風暖凌開土冒泉動游塵曝日鳴雉依隴
主人拂黃冠拭藥杖布蔬種平圻壤通畔
脩直膏畝夷敞白莖紫蒂豚耳鴨掌溝東
陌西行三畦兩既區既鉏乃露乃映句萌

欲伸藁芽將散尔乃晨露夕陰霏雲四委
沉雷遠震飛雨輕洒徐未及晞疾而不靡
柔莖爰秀剗甲以解稚葉萍布弱陰競抽
萋萋翼翼沃沃油油下歲蕤而被迳上參
差而覆疇承朝陽之麗景得傾柯之所投
仕非魯相有不拔之利賓惟二仲無逸馬
之憂顧堇荼而莫偶豈蘋藻之薦羞若乃
鄰老談稼女嫗歸桑拂此葦席炊彼糗梁
甃壺援醢曲瓢卷漿乃羹乃滌堆鼎盈筐
甘旨菡脆柔滑芬芳消淋逐水潤胃調腸

於是既飲徹盤投筯回小人之腹爲君子
之慮近觀物運遠訪師聖聲數後彰律理
前定烏非黔黑鶴豈浴淨彼圓行而方止
固得之於天性伊冬簔而夏裘無雙功而
並盛盪然任心樂道安命春風夕來秋日
一作秋月一作晨映獨酌南軒擁琴孤聽篇章間作
以歌以詠魚深沉而鳥高飛孰知美色之
爲止

鮑氏集卷第二

鮑氏集卷第三

代東武吟

一本已下
並無代字

代出自薊北門行

代結客少年場行

代東門行

代苦熱行

代白頭吟

代蒿里行

代放歌行

代昇天行

代別鶴操

代雉朝飛

代淮南王二首

代空城雀

代鳴鴈行

代夜坐吟

代北風涼行

代春日行

代少壯時至衰老行

代陽春登荆山行荆一作京

代朗月行

代堂上歌

代貧賤愁苦行

代邊居行

代門有車馬客行

代悲哉行

代擢歌行

代邽街行一本作去邪行

代陳思王白馬篇

代陳思王京洛篇

代陸平原君子有所思行

代白紵曲二首

代白紵舞歌詞四首奉始興王命作并啟

代東武吟

主人且勿誼賤子歌一言僕本寒鄉士出身蒙漢恩始隨張校尉召募到河源後逐李輕車追虜出塞垣密塗亘萬里寧歲猶七奔肌力盡鞍甲心思歷涼温將軍既下世部曲亦罕存時事一朝異孤績一作憤誰復論少壯辭家去窮老還入門一作鏃刈葵

藿倚杖牧雞豚昔如鞬上鷹今似檻中猿徒結千載恨空負百年怨棄席思君幄疲馬戀君軒顛垂晉主惠不媿田子魂

代出自薊北門行

羽檄起邊亭烽火入咸陽徵師屯廣武分兵救朔方嚴秋筋竿勁虜陣精且強天子按劍怒使者遙相望鴈行緣石徑魚貫渡飛梁簫鼓流漢思旌甲被胡霜疾風衝塞起沙礫自飄揚馬毛縮如蝟角弓不可張時危見臣節世亂識忠良投軀報明主身

死爲國殤

代結客少年場行

驄馬金絡頭錦帶佩吳鉤
失意杯酒間白刃起相讎
追兵一旦至負劍遠行遊
去鄉三十載復得還舊丘
昇高臨四闕表裏望皇州
九塗平若水雙闕似雲浮
扶宮羅將相夾道列王侯
日中市朝滿車馬若川流
擊鍾陳鼎食方駕自相求
今我獨何爲埴堞懷百憂

代東門行

傷禽惡弦驚驚一作強倦客惡離聲
離聲斷客情賓御皆涕零
涕零心斷絕將去復還訣
一息不相知何況異鄉別
遙遙征駕遠杳杳白日晚
居人掩閨卧行子夜中飯
野風吹秋木行子心腸斷
食梅常苦酸衣葛常苦寒
絲竹徒滿坐憂人不解顏
長歌欲自慰彌起長恨端

代苦熱行

赤坂橫西阻火山赫南威
身熱頭且痛鳥墜魂來歸
湯泉發雲潭焦煙起石圻

一作磯

日月有恒昏雨露未嘗晞丹蛇踰百尺玄
蜂盈十圍含沙射流影吹蠱病行暉瘴氣
晝熏體草露衣霑衣飢猴莫下食晨禽不
敢飛毒涇尚多死渡瀘寧具腓生軀蹈死
地昌志登禍機戈船榮既薄伏波賞亦微
爵輕君尚惜士重安可希

代白頭吟

直如朱絲繩清如玉壺冰何慙宿昔意猜
恨坐相仍人情賤恩舊世議逐衰興毫髮
一為瑕丘山不可勝食苗實碩鼠點白信

蒼蠅鳧鵠遠成美薪芻前見陵申黜褒女
進班去趙姬昇周王日淪惑漢帝益嗟稱
心賞猶難恃貌恭豈易憑古來共如此非
君獨撫膺

代蒿里行

同盡無貴賤殊顛有窮申馳波催永夜零
露逼短晨結我幽山駕去此滿堂親虛容
遺劔佩實貌戢衣巾斗酒安可酌尺書誰
復陳年代稍推遠懷抱日幽淪人生良自
劇天道與何人齎我長恨意歸為狐兔塵

代放歌行

蓼虫避葵董習苦不言排小人自齷齪安
知曠士懷雞鳴洛城裏禁門平旦開冠蓋
縱橫至車騎四方來素帶曳長飆華纓結
遠埃日中安能止鐘鳴猶未歸夷世不可
逢賢君信愛才明慮自天斷不受外嫌猜
一言分珪爵片善辭草萊豈伊白璧賜將
起黃金臺今君有何疾臨路獨遲迴

代昇天行

家世宅關輔勝帶官王城備聞十帝事委

曲兩都情倦見物興衰驟覩俗屯平翩翻
若回掌恍惚似朝榮窮途悔短計晚志重
長生從師入遠岳結友事仙靈五圖發金
記九籀隱丹經松餐委松宿雲卧恣天行
冠霞登綵閣解玉飲樹庭暫遊越萬里少
別數千齡鳳臺無還駕簫管有遺聲何時
與汝曹啄腐共吞腥

代別鶴操

雙鶴俱起時徘徊滄海間長弄若天漢輕
軀似雲懸幽客時結侶提攜遊三山青繳

凌瑤臺丹羅籠紫煙海上悲風急三山多
雲霧散亂一相失驚孤不得住緬然日月
馳遠矣絕音儀有顙而不遂無怨以生離
鹿鳴隱深草蟬鳴隱高枝心自有所存旁
人那得知

代雉朝飛

雉朝飛振羽翼專場挾兩一本下
有雌字恃強力媒
已驚翳又逼黃間潛穀盧矢直刎繡頸碎
錦臆絕命君前無怨色握君手執杯酒意
氣相傾死何有

代淮南王二首

淮南王好長生服食練氣讀仙經琉璃藥
椀牙作盤金鼎玉匕合神丹神丹神丹戲
紫房紫房綵女弄明璫鸞歌鳳舞斷君腸
朱城九門門九閨顙逐明月入君懷入君
懷結君佩怨君恨君恃君愛築城思堅劔
思利同盛同衰莫相棄

代空城雀

雀乳四擊空城之阿朝食野粟夕飲冰河
高飛畏鴟鳶下飛畏網羅辛傷伊何言怵

迫良已多誠不及青鳥遠食玉山亦猶勝
吳宮鷺無罪得焚窠賦命有厚薄長歎欲
如何

代鳴鴈行

邕邕鳴鴈鳴始旦齊行命侶入雲漢中夜
相失羣離亂留連徘徊不忍散憔悴容儀
君不知辛苦風霜亦何為

代夜坐吟

冬夜沉沉夜坐吟含聲未發已知心霜入
幕風度林朱燈滅朱顏尋體君歌逐君音

不貴聲貴意深

代北風涼行

北風涼雨雪雱京洛女兒多嚴粧遙豔帷
中自悲傷沉吟不語若有忘問君得行何
當歸苦使妾坐自傷悲慮年至慮顏衰情
易遠恨難追

代春日行

獻歲發吾將行春山茂春日明園中鳥多
嘉聲梅始發桃始青汎舟艫齊擢驚奏採
菱歌鹿鳴風微起波微生絃亦發酒亦傾

入蓮池折桂枝芳神動芬葉披兩相思兩不知

代少年時至衰老行

憶昔少年時馳逐好名晨結友多貴門出入富兒鄰綺羅豔華風車馬自揚塵歌唱青琴女彈箏燕趙人好酒多芳氣餽味厭時新今日每相念此事邈無因寄語後生子作樂當及春

代陽春登荆山行荆一作京

旦登荆山頭崎嶇道難遊早行犯霜露苔

滑不可留極眺入雲表窮目盡帝州方都列萬室層城帶高樓奕奕朱軒馳紛紛高衣流日氣映山浦暄霧逐風收花木亂平原桑柘盈一作平疇攀條弄紫莖藉露折芳柔遇物雖成趣念者不解憂且共春酒長歌登山丘

代朗月行

朗月出東山照我綺窓前窓中多佳人被服妖且妍靚妝坐帳裏當戶弄清絃鬢奪衛女迅體絕飛燕先為君歌一曲當作朗

月篇酒至顏自解聲和心亦宣千金何足
重所存意氣間

代堂上歌行

四坐且莫諠聽我堂上歌昔仕京洛時高
門臨長河出入重宮裏結友曹與何車馬
相馳逐賓朋好容華陽春孟春月朝光散
流霞輕步逐芳風言笑弄丹葩暉暉朱顏
醜紛紛織女梭滿堂皆美人自我對湘娥
雖謝侍君閑明妝帶綺羅箏笛更彈吹高
唱好相和萬曲不關心一曲動情多欲知

情厚薄更聽此聲過

代貧賤愁苦行

湮沒雖死悲貧苦即生劇長歎至天曉愁
苦窮日夕盛顏當少歇鬢髮先老白親友
四面絕朋知斷三益空庭慙樹萱藥餌媿
過客貧年忘日時黯顏就人惜俄頃不相
酬慙愧面已赤或以一金恨便成百年隙心
爲千條計事未見一獲運圯津塗塞遂轉
死溝洫以此窮百年不如還窀穸

代邊居行

少年遠京荆一作陽遙遙萬里方陋巷絕人徑
茅屋摧山崗不覩車馬迹但見麋鹿場長
松何落落丘隴無復行邊地無高木蕭蕭
多白楊盛年日月盡一去萬恨長悠悠世
中人爭此錐刀忙不憶貧賤時富貴輒相
忘紛紛徒滿目何關慨予傷不如一畝中
高會挹清漿遇樂便作樂莫使候朝光

代門有車馬客行

門有車馬客問客何鄉士捷步往相訊果
得舊鄰里悽悽聲中情慙慙增下理一作語

昔有故悲論今無新喜清晨相訪慰日暮
不能已歡戚競尋緒設調何終止辭端竟
未究忽唱分途始前悲尚未弭後感方復
起嘶聲盈我口設言在君耳手迹可傳心
願爾駕一作行李

代悲哉行

羈人感洲景緣感欲回轍我行詎幾時華
實驟舒結覩實情有悲瞻華意無悅覽物
懷同志如何復乖別翩翩翔禽羅闐闐鳴
鳥列翔鳴尚疇偶所歎獨乖絕

代擢歌行

羈客離嬰時飄飄無定所昔秋寓江介茲
春客河澣往戢于役身顛言永懷楚泠泠
篠疏潭邕邕鴈循渚颺戾長風振搖曳高
帆舉驚波無留連舟人不躊竚

代邽街行

一本作去邪行

竚立出門衢遙望轉蓬飛蓬去舊根在連
翩逝不歸念我捨鄉俗親好久乖違慷慨
懷長想惆悵戀音徽人生隨時變遷化焉
可祈百年難必果千慮易盈虧

代陳思王白馬篇

白馬駢角弓鳴鞭乘北風要途問邊急雜
虜入雲中閉壁自往夏清野徑還冬僑裝
多關絕旅服少裁縫埋身守漢節沉命對
胡封薄暮塞雲起飛沙披遠松含悲望兩
都楚歌登四墉丈夫設計誤懷恨逐邊戎
罷別中國愛邀冀胡馬功去來今何道單
賤生所鍾但令塞上兒知我獨為雄

代陳思王京洛篇

鳳樓十二重四戶八綺牕繡榻金蓮花桂

柱玉盤龍珠簾無隔露羅幌不勝風寶帳
三千所爲爾一朝容揚芬此紫煙上垂絲綠雲
中春吹回白日霜歌落塞鴻但懼秋塵起
盛愛逐衰蓬坐視青苔滿卧對錦筵空琴
瑟縱橫散舞衣不復縫古來共歎薄君意
豈獨濃唯見雙黃鵠千里一相從

代陸平原君子有所思行

西出登雀臺東下望雲闕層閣肅天居馳
道直如髮繡甍結飛霞琤題納行月築山
擬蓬壺穿池類溟渤選色遍齊岱微聲匝

叩越陳鐘陪夕讌笙歌待明發年貌不可
還身意會盈歇蟻壤漏山阿絲淚燬金骨
器惡含滿歌物已忘厚生沒智哉衆多士服
埋辨昭昧

代白紵曲二首

朱脣動素袖舉洛陽少童

一作年

邯鄲女古稱

綠水今白紵催絃急管爲君舞窮秋九月
荷葉黃北風驅鴈天雨霜夜長酒多樂木
央
春風澹蕩俠思多天色淨綠氣研和含桃

紅萼蘭紫芽朝日灼爍
發園華卷幌結帷
羅玉筵齊謳秦吹盧女絃
千金雇笑買芳
年

代白紵舞歌詞四首

奉始興王命作并啟

侍郎臣鮑照啟被教作白紵舞歌詞謹竭
庸陋裁爲四曲附啟上呈識方泐悴思塗
猥局言既無雅聲未能文不足以宣贊聖
旨抽拔妙實謹遣簡餘慙隨悚盈謹啟

詞

吳刀楚製爲佩褱織羅霧縠垂羽衣含商

咀徵歌露晞珠履颺沓紈袖飛淒風夏起
素雲回車怠馬煩客忘歸蘭膏明燭承夜
暉

桂宮栢寢擬天居朱爵文牕鞞碧䟽象床
瑤席鎮犀渠雕屏合匝組帷一作帳舒秦箏趙
瑟挾笙竽垂璫散佩盈玉除停觴不御欲
誰湏

三星差池露霑濕絃悲管清月將入寒光
蕭條候虫急荆王流歎楚妃泣紅顏難長
時易戢凝華結綵久延立非君之故豈妄

集

池中赤鯉庖所捐琴高乘去飛上天命逢
福世丁溢恩簪金藉綺昇曲筵恩厚德深
委如山潔誠洗志期暮年烏白馬角寧足
言

鮑氏集卷第三

鮑氏集卷第四

擬古八首

擬青青陵上栢

學劉公幹體五首

擬阮公夜中不能寐

學陶彭澤體奉和王義興

紹古辭七首

幽蘭五首

學古一作北風雪

擬古八首

魯客事楚王懷金襲丹素既荷主人恩又
蒙令尹顧日宴罷朝歸鞍馬塞衢路宗黨
生光輝賓僕遠傾慕富貴人所欲道得亦
何懼南國有儒生迷方獨淪誤伐木清江
湄設罝守兔免

十五諷詩書篇翰靡不通弱冠參多士飛
步游秦宮側觀君子論預見古人風兩說
窮舌端五車摧筆鋒羞當白璧貺恥受聊
城切晚節從世務乘障遠和戎解佩襲
犀渠卷裘奉盧弓始願力不及安知今所

終

幽并重騎射少年好馳逐羶帶佩雙鞬象
弧插彫服獸肥春草短飛鞚越平陸朝遊
鴈門上暮還樓煩宿石梁有餘勁驚雀無
全目漢虜方未和邊城屢翻覆畱我一白
羽將以分符竹
鑿井北陵隈百丈不及泉生事本瀾漫何
用獨精堅幼壯重寸陰衰暮反輕年放駕
息朝歌提爵止中山日夕登城隅周迴視
洛川街衢積凍草城郭宿寒煙繁華悉何

在宮闕久崩填空謗齊景非徒稱夷對賢
伊昔不治業倦遊觀五都海岱饒壯士蒙
泗多宿儒結髮起躍馬垂白對講書呼我
升上席陳解發瓢壺管仲死已久墓在西
北隅後面崔嵬者亘公舊家廬君來誠既
晚不覩崇明初玉琬徒見傳支友義漸踈
東薪幽篁裏刈黍寒澗陰朔風傷我肌號
鳥驚思心歲暮井賦訖程課相追尋田租
送函谷獸藁輸上林河渭冰未開關隴雪
正深笞擊官有罰呵辱吏見侵不謂乘軒

意伏櫪還至今

河畔草未黃胡鴈已矯翼秋螿扶戶吟寒
婦成夜織去歲征人還流傳舊相識聞君
上隴時東望久歎息宿昔改衣帶朝旦異
容色念此憂如何夜長愁更多明鏡塵匣
中寶琴生網羅

蜀漢多竒山仰望與雲平陰崖積夏雪陽
谷散秋榮朝朝見雲歸夜夜聞猿鳴憂人
本自悲孤客容易傷情臨堂設樽酒留酌思
平生石以堅為性君勿慙一作素誠

擬青青陵上栢

涓涓亂江泉，繚繚橫海煙。浮生旅昭世，空
事歎華年。書翰幸閑暇，我酌子縈絃。飛鏹
出荆路，驚服入秦川。渭濱富皇居，鱗館匝
河山。輿童唱秉榘，女歌采蓮乎。愉鸞閣
上窈窕，鳳楹前娛生信。非謬安用求，多賢
學劉公幹體五首
欲官乏王事，結主遠恩私。為身不為名，散
書徒滿帷。連冰上冬月，披雪拾園葵。聖靈
燭區外，小臣良見遺。

曠曠寒野霧蒼蒼，陰山栢樹迥霧縈。集山
寒野風急，歲物盡淪傷。孤貞為誰立，賴樹
自能貞。不計迹幽澁。

胡風吹朔雪，千里渡龍山。集君瑤臺上，飛
舞兩楹前。茲晨自為美，當避豔陽天。豔陽
桃李節皎潔，不成妍。

荷生淶泉中，碧葉齊如規。迴風蕩流霧，珠
水逐條垂。彪炳此金塘，藻耀君玉池。不愁
世賞絕，但畏盛明移。

白日正中時，天下共明光。北園有細草，當

晝正含霜永榮頓如此何用獨芬芳抽琴
為爾歌絃斷不成章

擬阮公夜中不能寐

漏分不能卧酌酒亂繁憂惠氣憑夜清素
景緣隙流鳴鶴時一聞千里絕無傳佇立
為誰久寂寞空自愁

學陶彭澤體

奉和王義興

長憂非生意短顙不須多但使罇酒滿朋
舊數相過秋風七八月清露潤綺羅提琴
當戶坐歎息望天河保此無傾動寧復滯

風波

紹古辭七首

橘生湘水側菲陋人莫傳逢君金華宴得
在玉几前三川窮名利京洛富妖妍恩榮
難久恃隆寵易衰偏觀席妾淒愴覩翰君
泣然徒抱忠孝志猶為葑菲遷昔與君別
時蠶妾初獻絲何言年月駛寒衣已擣治
緜繡多廢亂篇帛久塵縑離心壯為劇飛
念如懸旗石席我不爽德音君勿欺
瑟瑟涼海風竦竦寒山木紛紛羈思盈慙

憊夜弦促訪言山海路千里歌別鶴絃絕
空咨嗟形音誰賞錄辛苦異人狀美貌改
如玉徒畜巧言鳥不解心款曲孤鴻散江
嶼連翩遵渚飛含嘶衡桂浦馳顧河朔畿
攢攢勁秋木昭昭淨冬暉牕前滌歡爵帳
裏縫舞衣芳歲猶自可日夜望君歸
憑楹翫夜月迴眺出谷雲還山路已遠往
海不及羣徘徊清淮汭顧慕廣江憤物情
乖喜歇守操古難聞三越豐少姿容態傾
動君

開黛靚容一作朝顏臨鏡訪遙塗君子事河源
彌祀闕還書春風掃地起飛塵生綺疏文
袿為誰設羅帳空卷舒不怨身孤寂但念
星隱隅

暖歲節物早萬萌迎春達春風夜嬾娟春
霧朝菴藹軟蘭葉可采柔桑條易將怨咽
對風景悶瞽守閨闈天傳愁民命含生但
契闊憂來無行伍歷亂如覃葛

幽蘭五首

傾輝引暮色孤景留恩顏梅歇春欲罷期

渡往不還

簾委蘭蕙露帳含桃李風攬帶昔何道坐
令芳節終

結佩徒分明抱梁輒乖牙華落知不終空
愁坐相誤

眇眇蛸掛網漠漠蠶弄絲空慙不自信怯
與君劃期

陳國鄭東門古今共所知長袖暫徘徊駟
馬停路歧

學古一作北風雪

北風十二月雪下如亂巾實是愁苦節惆

悵憶一作別情親會得兩少妾同是洛陽人嬛

絲好眉目閑麗美腰身凝膚皎若雪明淨

色如神驕愛生盼矚聲媚起朱脣衿服雜

縵績首飾亂瓊珍調絃俱起舞為我唱梁

塵人生貴得意懷願待君申幸值嚴冬暮

幽夜方未晨齊衾久兩設角枕已雙陳願

君早休息留歌待三春

昔早於道...

幽身...

遠之...

與...

...

...

...

...

鮑氏集卷第五

潯陽還都道中

還都道中三首

還都口號

還都至三山望石頭城

過銅山掘黃精

日落望江贈荀丞

行樂至城東橋

荅客

白雲

和王丞

秋夜二首

觀圃人藝植

詠採桑

詠雙鷺二首

發後渚

數詩

建除

從過舊宮

從拜陵登京峴

臨川王服竟還田里

潯陽還都道中

昨夜宿南陵今日入蘆洲客行惜日月崩
波不可留侵星赴早路畢景逐前傳鱗鱗
夕雲起獵獵晚風道騰沙鬱黃霧翻浪揚
白鷗登艫眺淮甸掩泣望荆流絕目盡平
原時見遠煙浮倏忽坐還合俄思甚兼秋
未嘗違戶庭安能千里遊誰令乏古節貽
此越鄉憂

還都道中三首

悅懌遂還心踊躍貪至勤鳴雞戒征路暮
息落日分急流騰飛沫回風起江濱孤獸
啼夜侶離鴻噪霜羣物哀心交橫聲切思
紛紜歎慨訴同旅美人無相聞風急訊灣
浦裝高偃檣舳夕聽江上波遠及千里目
寒律驚窮蹊爽氣起喬木隱隱日沒岫瑟
瑟風散谷鳥還暮林誼潮上水結泱夜分
霜下淒悲端出遙陸愁來攢人懷羈心苦
獨宿

久官迷遠川川廣每多懼薄止閭邊亭關

歷險程路憲霽冥寓岫濛昧江上霽時涼
籟爭吹流洑浪奔趣一作測馬增愁起搔首
東南顧茫然荒野中舉目皆凜素回風揚
江泌寒棲動樹太息終晨漏企我歸颺遇

還都口號

分壤蕃帝華列正藹皇宮禮讌及年暇朝
奏因歲通維舟歇金景結棹俟昌風鉦歌
首寒物歸吹踐開冬陰沉煙塞合蕭瑟涼
海空馳霜急歸節幽雲慘天容旌鼓貫玄
塗羽鷁被長江君王遲京國遊子思鄉邦

恩世共渝洽身願兩扳逢勉哉河濟客勤
尔尺波功

還都至三山望石頭城

泉源安水流川未澄遠波晨光被水族曉
氣歇林阿两江皎平迥三山鬱駢羅南帆
望越嶠北榜指齊河關扃繞天邑襟帶抱
尊華長城非壑嶮峻岨似荆茅攢樓貫白
日槁堞隱丹霞征夫喜觀國遊子遲見家
流連入京引躑躅望鄉歌彌前嘆景促逾
近勸路多偕萃猶如茲弘易將謂何

過銅山掘黃精

土昉閔中經水芝韜內策寶餌緩童年命
藥駐衰曆矧蓄中古情重拾煙霧迹羊角
棲斷雲榼口流隘石銅溪晝亦林沉乳竇夜
涓滴既類風門磴後象天并壁蹠蹠寒葉
離濃濃秋水積松色隨野深月露依草白
空守江海思豈愧梁鄭客得仁古無怨順
道今何惜

日落望江贈荀丞

旅人之愉樂薄暮增思深日落嶺雲歸延

頌望江陰亂流漲大壑長霧匝高林林際
無窮極雲邊不可尋惟見獨飛鳥千里一
揚音推其感物情則知遊子心君居帝京
內高會日揮金豈念慕羣客咨嗟戀景沉
行樂至城東橋

雞鳴關吏起伐鼓早通晨嚴車臨迥陌延
瞰歷城闈蔓草緣高隅脩楊夾廣津迅風
首旦發平路塞飛塵擾擾遊宦子營營市
井人懷金近從利撫劍遠辭親爭先萬里
塗各事百年身開芳及稚節含絲吝驚春
尊賢永照灼孤賤長隱淪容華坐銷歇端
爲誰苦辛

荅客

幽居屬有念含意未連詞會客從外來問
君何所思澄神自惆悵嘿慮久迴疑謂賓
少安席方爲子陳之我以華門士負學謝
前基愛賞好偏越放縱少矜持專求遂性
樂不計緝名期歡至獨斟酒憂來輒賦詩
聲交一作稍希歇此意更堅滋浮生急馳
電物道險絃絲深憂寡情謬進伏兩睽時

願賜卜身要得免後賢嗤

白雲

探靈喜解骨測化善騰天情高不戀俗猷
世樂尋仙鍊金宿明館屑玉止瑤淵鳳歌
出林關龍駕渡蓬山凌崖采三露攀鴻戲
五煙昭昭景臨霞湯湯風媚泉命娥雙月
際要媛兩星間飛虹眺卷河汎霧弄輕絃
笛聲謝廣賓神道不復傳一逐白雲去千
齡猶未旋

和王丞

限生歸有窮長意一作憶無已年秋心日迫絕
春思坐連綿銜協曠古顛斟酌高代賢迹
迹俱浮海採藥共還山夜聽橫石波朝望
宿崑煙明間予公越飛蘿子縈牽性好必
齊遂迹幽非妄傳滅志身世表歲名琴酒
間

秋夜二首

夜久膏既竭啟明旦未央環情倦始復空
闇一作閣起晨裝幸承天光轉曲景入幽堂徘徊
集通隙宛轉燭迴梁帷風自卷舒簾露

視成行歲役急窮晏生慮備溫涼絲紈夙
染濯綿綿夜裁張冬雪旦夕至公子乏衣
裳華心愛零落非直惜容光顏君翦衆念
且共覆前觴

遁跡避紛喧賀農棲寂寞荒徑馳夜鼠空
庭聚山雀既遠人世歡還賴泉卉樂折柳
樊場圃負縷汲潭壑霽旦見雲峰風夜聞
海鶴江介早寒來白露先秋落麻壟方結葉
瓜田已掃箨傾暉忽西下迴景思華幕攀
蘿席中軒臨觴不能酌終古自多恨幽悲

共淪鑠

觀圃人藝云植

善賈笑蠶漁巧官賤農牧遠養遍關市深
利窮海陸乘輶實金羈當鑪信珠服居無
逸身伎安得坐梁肉徒承屬生幸政緩吏
平睦春畦及耘藝秋場早芟築澤閱既繁
高山營又登熟抱插壠上食結茅野中宿
空識已尚淳寧知俗翻覆

詠採桑

季春梅始落工女事蠶作

一本下有明鏡淨分
桂光顏畢苔夢二句

採桑淇洧間，還戲上宮閣。早蒲時結陰，晚
篁初解籜。藹藹霧洒閨，融融景盈幕。乳鷺
逐草蟲，巢蜂拾花藥。是節最暄妍，佳服又
新爍。綿歎對迥塗，揚歌弄場藿。抽琴試杼
思，薦珮果成託。承君郢中美，服義久心諾。
衛風古愉豔，鄭俗舊浮薄。靈顛悲渡湘，宓
賦笑灑洛。盛明難重來，淵意爲誰涸。君其
且調絃，桂酒妾行酌。

詠雙鷺二首

雙鷺戲雲崖，羽翰始差池。出入南閨裏，經
過北堂垂。意欲巢君幙，層楹不可窺。沉吟
芳歲晚，徘徊韶景移。悲歌辭舊曲，愛銜淚覓
新知。

可憐雲中鷺，旦去暮來歸。自知羽翅弱，不
與鵠爭飛。寄聲謝飛鵠，往事子毛衣。瑣心
誠貧薄，正去節榮衰。陰山饒苦霧，危節多
勁威。豈但避霜雪，當一作復傲野人機。

發後渚

江上氣早寒，仲秋始霜雪。從軍乏衣糧，方
冬與家別。蕭條背鄉心，悽愴清渚發。涼埃

晦平臯飛潮隱脩 孤光獨徘徊空煙視
昇滅塗隨前峰遠意逐後雲結華志宏馳
年韶顏慘驚節推琴三起歎聲爲君斷絕

數詩

一身仕關西家族滿山東二年從車駕齋
祭甘泉宮三朝國慶畢休沐還舊邦四牡
輝長路輕蓋若飛鴻五侯相餞送高會集
新豐六樂陳廣坐祖帳揚春風七盤起長
袖庭下列歌鍾八珍盈雕俎綺肴紛錯重
九族共瞻遲賓友仰徽容十載學無就善

宦一朝通

建除

建旗出燉煌西討屬國羌除去徒與騎戰
車羅萬箱滿山又填谷投鞍合營墻平原
亘千里旗鼓轉相望定舍後未休後驛勅
前裝執戟無暫傾彎弧不解張破滅西零
國生虜郅支王危亂悉平蕩萬里置關梁
成軍入玉門士女獻壺漿收功在一時歷世
荷餘光開壤襲朱紱左右佩金章閉帷草
太玄茲事殆愚狂

從過舊宮

肅裝屬雲旅奉勒承末塗嚴恭履桑梓加
敬覽扮榆靈命蘊川瀆帝寶伏篇圖席變
由石紐龍翔自鼎湖功冠生民始道妙神
器初宮陞留前一作昔制歌思溢今衢餘祥見
雲物遺像存陶漁泉流信清泌原野實甘
荼豈伊愛艷鄙天險無上腴東秦邦北門
非親誰克居仁聲日月懋惠澤雲雨敷盧
令美何歇唐風久不渝微臣逢世慶征賦
備人徒空費行葦德採束謝生芻

從拜陵登京峴

孟冬十月交殺盛陰欲終風烈無勁草寒
甚有凋松軍并冰晝結士馬旣夜重晨登
峴山首霜雪凝未通息鞍循隴上支劔望
雲峰表裏觀地嶮昇降究天容東岳覆如
礪羸海安足窮傷哉良永矣馳光不再中
衰賤謝遠顛疲老還舊邦深德竟何報徒
令田陌空

臨川王服竟還田里

送往禮有終事居慙懦薄稅駕罷朝衣歸

志類巢壑尋思邈無報退命愧天爵捨耨
將十齡還得守場藿道經盈竹筍農書滿
塵閣愴愴秋風生戚戚寒緯作豐霧粲草
華高月麗雲崿屏跡勤躬稼衰疾倚芝藥
顧此謝人羣豈直止商洛

鮑氏集卷第五

鮑氏集卷第六

行京口至竹里

登翻車峴

冬日

詠史

從庾中郎遊園山石室

自礪山東望震澤

登雲陽九里埭

與伍侍郎別

吳興黃浦亭庾中郎別

送別王宣城

送從弟道秀別

贈傅都曹別

和傅大農與僚故別

送盛侍郎餞候亭

與荀中書別

喜雨奉勅作

詠蕭史

贈故人馬子喬六首

採菱歌七首

山行見孤桐

行京口至竹里

高柯危且踈
鋒石橫復仄
複澗隱松聲
重崖伏雲色
冰閉寒方壯
風動鳥傾翼
折志逢凋嚴
孤遊值曛逼
蕪塗無憇鞍
半菽不遑食
君子樹令名
細人効命力
不見長河水
清濁俱不息

登翻車峴

高山絕雲霓
深谷斷無光
晝夜淪霧雨
冬夏結寒霜
淖坡既馬嶺
磧路又羊腸
畏塗

疑旅人忘轍覆行箱昇岑望原陸四眺極
川梁遊子思故居離客遲新鄉知新有客
慰追故遊子傷

冬日

巖雲亂山起白日欲還次曛霧蔽窮天夕
陰晦寒地煙霾有氛氲精光無明異風急
野田空飢禽稍相棄含生共通閉懷賢孰
爲利天規苟平圓寧得已偏媚寫海有歸
潮衰容不還稚君今且安歌無念老方至

詠史

五都矜財雄三川養聲利百金不市死明
經有高位京城十二衢飛甍各鱗次仕子
影華纓遊客竦輕轡明星晨未稀軒蓋已
雲至賓御紛颯沓鞍馬光照地寒暑在一
時繁華及春媚君平獨寂寞身世兩相棄

從庾中郎遊園山石室

荒塗趣山楹雲崖隱靈虛一作室崗澗紛縈抱
林障沓重密昏昏磴路深活活梁水疾幽
隅秉畫燭地牖窺朝日怪石似龍章瑕璧
麗錦質洞庭安可窮漏井終不溢沉空絕

景聲崩危坐驚慄神化豈有方妙象竟無
述至哉鍊玉人處此長自畢

自礪山東望震澤

瀾漫潭洞波合沓崿嶂雲漲島遠不測崗
澗近難分幽篁愁暮見思鳥傷夕聞以此
藉沉痾棲迹別人羣結言非盡書有念豈
敷文

登雲陽九里埭

一作塚

宿心不復歸流年抱衰疾既成雲雨人悲
緒終不一徒憶江南聲空錄齊后瑟方絕

縈絃思豈見繞梁日

與伍侍郎別

民生如野鹿知愛不知命飲齧具攢聚翹
陸歛驚迸傷我慕類心感尔食苹性漫漫
鄔郢塗渺渺淮海途子無金石質吾有犬
馬病憂樂安可言離會孰能定欽哉慎所
宜砥德乃爲盛貧遊不可忘久交念敦敬

吳興黃浦亭庾中郎別

風起洲渚寒雲上日無輝連山眇煙霧長
波迥難依旅鴈方南過浮客未西歸已經

江海別復與親眷違奔景易有窮離袖安
可揮懽觴爲悲酌歌服成泣衣溫念終不
渝藻志遠存追役人多牽滯顧路慙奮飛
昧心附遠翰烟言藏佩韋

送別王宣城

發郢流楚思涉淇興衛情既逢青春獻復
值白蘋生廣望周千里江郊藹微明簾爵
自惆悵歌管爲誰清潁陰騰前藻淮陽流
昔聲樹道慕高華屬路佇深馨

送從弟道秀別

參差生密念躑躅行思疑疑一作悲思戀光景
密念盈一作彌歲時歲時多阻折光景乏安怡
以此苦風情日夜驚懸旗登山臨朝日揚
袂別所思浸淫旦潮廣瀾漫宿雲滋天陰
先發路遠常早辭篇詩後相憶杯酒今
無持遊子苦行役冀會非遠期

贈傅都曹別

輕鴻戲江潭孤鴈集洲沚邂逅兩相親緣
念共無已風雨好東西一隔頓萬里追憶
栖宿時聲容滿心耳日落川渚寒愁雲繞

起短翮不能翔徘徊煙霧裏

和傅大農與僚故別

絕節無緩響傷鴈有哀音非同年歲意誰
共別離心伊昔謬通塗冠履預人林浮江
望南岳登潮窺海陰孰謂遊居淺慕美久
相深萋萋春草秀嚶嚶喜候禽辰物盡
明茂尊盛獨幽沉之子安所適我方栖舊
岑墜歡豈更接明愛邈難尋

送盛侍郎餞候亭

霜霜襲冠帶驅駕越城闔北臨出塞

望入鄉津高墉宿寒霧平野起秋塵君爲
坐堂子我乃負羈人欣悲豈等志甘苦誠
異身結涕園中草憔悴悲此春

與荀中書別

勞舟厭長浪疲旆倦行風連翩感孤志契
闊傷賤躬親交篤離愛眷戀置酒終敷文
勉征念罷落慰愁容思君竒涉洧撫已謠
渡江慙無黃鶴翅安得久相從顛遂宿知
意不使舊山空

喜雨

奉
勅作

營社達羣陰屯雲揜積陽河井起龍蒸日
魄斂遊光族雲飛泉室震風沉羽鄉升霽
浹地維傾潤瀉天潢平灑周海岳曲潦溢
川莊驚雷鳴桂渚迴涓流玉堂珍木抽翠
條爰卉濯朱芳關市欣九賦京廩開萬箱
無謝堯爲君何用知柏篁

詠蕭史

蕭史愛少年羸女姦童顏火粒顙排棄霞
霧好登攀龍飛遙天路鳳起出秦關身去
長不返簫聲時往還

此忽分形雌沉吳江裏雄飛入楚城吳江
深無底楚關有崇扃一爲天地別豈直限
幽明神物終不隔千祀儻還并

採菱歌七首

驚舲馳桂浦息棹偃椒潭簫弄澄湘北菱
歌清漢南

弭榜塞蕙蕙停唱紉薰若含傷拾泉花縈
念採雲萼

睽閣逢暄新悽怨值妍華秋心不可盪春
思亂如麻

要豔雙嶼裏望美兩洲間裊裊風出浦容
容日向山
烟曠越障深箭迅楚江急空抱琴中悲徒
望近關泣
緘歎凌珠淵收慨上金堤春芳行歇落是
人方未齊
思今懷近憶望古懷遠識懷古復懷今長
懷終無極

山行見孤桐

桐生藂石裏根孤地寒陰上倚崩峰勢下

帶洞阿深奔泉冬激射霧雨夏霖淫未霜
葉已肅不風條自吟昏明積苦思晝夜叫
哀禽棄妾望掩淚逐臣對撫心雖以慰單
危悲涼不可任幸願見雕斲爲君堂上琴

鮑氏集卷第六

鮑氏集卷第七

鮑氏集卷第七

見賈玉器者并序

從登香爐峰

夢歸鄉

從臨江王上荆初發新渚

望孤石

登黃鶴磯

歧陽守風

在江陵數年傷老

翫月城西門廨中

代挽歌

夜聽妓

梅花落

古辭

可愛

夜聽

酒後

講易

王昭君

中興歌曲十首

吳歌二首

與謝尚書莊三連句

在荊州與張使君李居士連句

月下登樓連句

字謎三首

見賣玉器者并序

見賣玉器者或人欲買疑其是珉不肯成

市聊作此詩以戲買者

涇渭不可雜珉玉當早分子實舊楚客蒙

俗謬前聞安知理乎采豈識質明温我方

歷上國從洛入函轅揚光十貴室馳譽四
豪門竒聲振朝邑高價服鄉村寧能與尔
曹瑜瑕稍辨論

從登香爐峰

辭宗盛荆夢登歌美鳧繹徒收杞梓饒曾
非羽人宅羅景藹雲扃沾光扈龍策御風
親列涂乘山窮禹迹合嘯對霧岑延蘿倚
峰壁青冥搖煙樹穹跨負天石霜崖減土
膏金澗測泉脉旋淵抱星漢乳竇通海碧
谷館駕鴻人巖棲咀丹客殊物藏珍怪竒

心隱仙籍高世伏音華綿古遁精魄蕭瑟
生哀聽參差遠驚覲慙無獻賦才洗汙奉
毫帛

夢歸鄉

銜淚出郭門撫劒無人達沙風暗空起離
心眷鄉畿夜分就孤枕夢想慙言歸孀婦
當戶歎搔絲復鳴機慙款論久別相將還
綺闈歷歷簷下涼朧朧帳裏輝刈蘭爭芬
芳採菊競葳蕤開奩奪香蘇探袖解纓微
寐中長路近覺後大江違驚起空歎息恍

惚神魂飛白水漫浩浩高山壯巍巍波瀾
異往復風雲改榮哀此土非吾土慷慨當
告誰

從臨海王上荆初發新渚

客行有苦樂但問客何行
板龍不待翼附驥絕塵冥
梁珪分楚牧羽鷁指全荆
雲艫掩江汜千里被連旌
戾戾旦風道嘈嘈晨鼓鳴
收纜辭帝郊揚棹發皇京
狐兔懷窟志犬馬戀主情
撫襟同太息相顧俱涕零
奉役塗未啟思歸思已盈

望孤石

江南多暖谷雜樹茂寒峯
朱華抱白雪陽條熙朔風
蚌節流騎藻輝石亂煙虹
泄雲去無極馳波往不窮
嘯歌清漏畢徘徊朝景終
浮生會當幾歡酌每盈衷

登黃鶴磯

木落江渡寒鴈還風送秋
臨流斷商絃瞰川悲棹謳
適郢無東轅還夏有西浮
三崖隱丹磴九派引滄流
淚竹感湘別弄珠懷漢遊
豈伊藥餌泰得奪旅人憂

岐陽守風

差池玉繩高掩映一作藹瑤井沒廣岸屯宿陰
懸崖棲歸月役人喜先馳軍令申早發洲
迥風正悲江寒霧未歇飛雲日東西別鶴
方楚越塵衣孰揮澣蓬思亂光髮

在江陵歎年傷老

五難未易夷三命戒淵抱方瞳起松髓頽
髮疑桂腦後生良自休大患安足保開簾
窺景夕備屬雲物好翩翩燕弄風嫋嫋柳
垂道池瀆亂蘋萍園援美花草節如驚灰

異零落就衰老

翫月城西門解中

始見西南樓纖纖如玉鉤末映東北墀娟
娟似娥眉娥眉蔽珠櫳玉鉤隔瑣窻三五
二八時千里與君同夜移衡漢落徘徊入
戶中歸華先委露別葉早辭風客遊馱苦
辛仕子倦飄塵休澣自公日宴慰及私辰
蜀琴抽白雪郢曲發陽春肴乾酒朱闌金
壺啟夕淪迴軒駐輕蓋留酌待情人

代挽歌

獨處重冥下憶昔登高臺傲岸平生中不
爲物所裁埏門只復閉白蟻相將來生時
芳蘭體小蟲今爲災玄鬢無復根枯骸依
青苔憶昔好飲酒素盤進青梅彭韓及廉
藺疇昔已成灰壯士皆死盡餘人安在哉

夜聽妓二首

夜來坐幾時銀漢傾露落澄愴入閨景歲
蕤被園藿絲管感暮情哀音遶梁作芳盛
不可恒及歲共爲樂天明坐當散琴酒馱
弦酌

蘭膏消耗夜轉多亂筵雜坐更絃歌傾情
逐節寧不苦特爲盛年惜容華

梅花落

中庭雜樹多偏爲梅咨嗟問君何獨然念
其霜中能作花露中能作實搖蕩春風媚
春日念尔零落逐寒風徒有霜華無霜質

古辭

容華不待年何爲客遊梁九月寒陰合悲
風斷君腸歎息空房婦幽思坐自傷勞心
結遠路惆悵獨未央

風帷關珠帶月幌垂霧羅魏粲縫秋裳趙
豔習春歌

夜聽聲

辭鄉不覺遠歡寡憂自繁何用慰秋望清
燭視夜翻

酒後

晨節無兩淹年意不俱處自非羽酌歡何
用慰愁旅

講易

雲澤翔羽姬橫益招逸人賁園無金尚履
道易書紳

王昭君

既事轉蓬遠心隨鴈路絕霜輝旦夕驚邊
笳中夜咽

中興歌十首

千冬逢一春萬夜見朝日生平值中興歡
起百憂畢

中興太平運化清四海樂祥景照玉臺紫
煙遊鳳閣

碧樓舍夜月紫殿爭朝光綵墀散蘭麝風
起自生芳
白日照前窻玲瓏綺羅中美人掩輕扇含
思歌春風
三五容色滿四五妙華歇已輸春日歡分
隨秋光設
北出湖邊戲前還苑中遊飛轂繞長松馳
管逐波流
九月秋水清三月春花滋千金逐良日皆
競中興時

窮泰已有分壽夭復屬天既見中興樂莫
持憂自煎
襄陽是小地壽陽非帝城今日中興樂遙
治在上京
梅花一時豔竹葉千年色顏君松柏心採
照無窮極

吳歌二首

夏口樊城岸魯公却月樓觀見流水還識
是儂淚流
人言荆江狹荆江定自闊五雨了無聞風

聲那得達

與謝尚書莊三連句

霞輝兮澗朗日靜兮川澄風輕桃欲開露
重蘭未勝水光溢兮松霧動山煙壘兮石
露凝掩映晨物綵連綿夕羽興

在荊州與張使君李居士連句

橋磴支古轍篁路拂輕鞍三尹無喜色一
適或垂竿

月下登樓連句

髣髴拂月光繽紛篁霧陰樂來亂憂念酒

至歇憂心鮑博士露入覺牖高芳深測苑深

清氣澄永夜流吹不可臨王廷秀密峰集浮

碧踈瀾道瀛潯嗽玉延幽性扳桂藉知音

荀原之辰意事淪晦良歡戒勿侵昭景有遣

駟孤賈無畱金荀中書萬秋

字謎三首

二形二體四支八頭四八二八飛泉仰流

頭如刀尾如鉤中央橫廣四角六抽右面

負兩刃左邊雙屬牛

乾之一九隻立無偶坤之二六宛然雙宿

鮑氏集卷第七

鮑氏集卷第七

鮑氏集卷第七

鮑氏集卷第七

鮑氏集卷第七

鮑氏集卷第七

鮑氏集卷第七

鮑氏集卷第七

鮑氏集卷第七

鮑氏集卷第七

鮑氏集卷第八

擬行路難十九首

松栢篇并序

侍宴覆舟山勅為柳元景作

登廬山二首

發長松遇雪

蒜山被始興王命作

冬至

蜀四賢詠

秋日示休上

和王義興七夕

贈鮑侍郎 釋惠休

荅休上人

和王護軍秋夕

懷遠人

春羈

三日

苦雨

三日游南苑

歲暮悲

園中秋散 一作園中戴散

詠秋

秋夕

望水

詠白雪

擬行路難十九首

奉君金卮之美酒
璊瑁玉匣之雕琴
七綵芙蓉之羽帳
九華蒲萄之錦衾
紅顏零落
戚將暮寒光宛轉
時欲沉顛
君裁悲且減
思聽我抵節行路吟
不見栢梁銅雀上寧

聞古時清吹音

洛陽名工鑄爲金博山千斲復萬鏤上刻
秦女攜手仙承君清夜之歡娛列置幃裏
明燭前外發龍鱗之丹綵內含麝芬之紫
煙如令君心一朝異對此長嘆終百年
璇閨玉墀上椒閣文牕繡戶垂羅幙中有
一人字金蘭被服織羅采芳藿春燕差池
風散梅開幃對景弄春爵含歌攬涕恒抱
愁人生幾時得爲樂寧作野中之雙鳧不
願雲間之別鶴

寫水置平地各自東西南北流人生亦有
命安能行歎復坐愁酌酒以自寬舉杯斷
絕歌路難心非木石豈無感吞聲躑躅不
敢言

君不見河邊草冬時枯死春滿道君不見
城上日今暝沒盡去明朝復更出今我何
時當得然一去永滅入黃泉人生苦多歡
樂少意氣敷腴在盛年且願得志數相就
床頭恒有沽酒錢功名竹帛非我事存亡
貴賤付皇天

對案不能食拔劍擊柱長歎息丈夫生世
會幾時安能蹠躩垂羽翼棄置罷官去還
家自休息朝出與親辭暮還往親側弄兒
床前戲看婦機中織自古賢盡貧賤何況
我輩孤且直

愁思忽而至跨馬出北門舉頭四顧望但
見松柏荆棘鬱樽樽中有一鳥名杜鵑言
是古時蜀帝魂聲音哀苦鳴不息羽毛憔
悴似人髣飛走樹間逐虫蟻豈憶往日天
子尊念此死生變化非常理中心惻愴不

能言

中庭五株桃一株先作花陽春沃若二三
月從風簸蕩落西家西家思婦見悲惋零
淚霑衣撫心歎初送我君出戶時何言淹
留節迴換床席生塵明鏡垢纖腰瘦削髮
蓬亂人生不得恒稱意惆悵從倚至夜半
對藥染黃絲黃絲歷亂不可治我昔與君
始相值尔時自謂可君意結帶與我言死
生好惡不相置今日見我顏色衰意中索
寞與先異還君金釵瑋簪不忍見此益

愁思

君不見舜華不終朝
湏臾淹冉零落銷
盛年妖豔浮華輩
不久亦當詣冢頭
一去無還期
千秋萬歲無音詞
孤魂煢煢空隴間
獨魄徘徊繞墳基
但聞風聲野鳥吟
豈憶平生盛年時
爲此令人多悲悵
君當縱意自熙怡

君不見
枯籜走階庭
何時復青著
故莖君不見
亡靈蒙享祀
何時傾盃竭
壺罌君當見
此起憂思
寧及得與時
人爭人生倏忽
如絕電
華年盛德幾時見
但令縱意存高尚
旨酒佳肴相旨
讌持此從朝竟
夕暮差得亡憂
消愁悒胡爲惆悵
不能已難盡此
曲令君忤

今年陽初花滿林
明年冬末雪盈岑
推移代謝紛交轉
我君邊戍獨稽沉
執袂分別已三載
邇來寂淹無分音
朝悲慘慘遂成滴
暮思繞繞最傷心
膏沐芳餘久不御
蓬首亂鬢不設簪
徒飛輕埃舞空帷
粉黛器靡復遺
自生留世苦不幸
心中惕惕恒

懷悲

春禽啾啾旦暮鳴最傷君子憂思情我初
辭家從軍僑榮志溢氣干雲霄流浪漸冉
經三齡忽有白髮素髭生今暮臨水拔已
盡明日對鏡復已盈恐羈死爲客思寄
滅生空精每懷舊鄉野念我舊人多悲聲
忽見過客問何我寧知我家在南城荅云
我曾居君鄉知君遊宦在此城我行離邑
已萬里今方羈役去遠征來時聞君婦閨
中孀居獨宿有貞名亦云朝悲泣閑房又

聞暮思淚霑裳形容憔悴非昔悅蓬鬢衰
顏不復黓見此令人有餘悲當願君懷不
暫忘

君不見少壯從軍去白首流離不得還故
鄉宵宵日夜隔音塵斷絕阻河關朔風蕭
條白雲飛胡笳哀急邊氣寒聽此愁人兮
奈何登山遠望得留顏將死胡馬跡寧見
妻子難男兒生世輒軻欲何道綿憂摧抑
起長歎
君不見柏梁臺今日丘墟生草萊君不見

阿房宮寒雲澤雉栖其中歌妓舞女今誰
在高墳疊疊滿山隅長袖紛紛伎競世非
我昔時千金軀隨酒逐樂任意去莫令含
歎下黃壚

君不見冰上霜表裏陰且寒雖蒙朝日照
信得幾時安民生故如此誰令摧折強相
看年去年來自自如削白髮零落不勝冠
君不見春鳥初至時百草含青俱作花寒
風蕭索一旦至竟得幾時保光華日月流
邁不相饒令我愁思怨恨多

諸君莫歎貧富貴不由人丈夫四十強而仕
餘當二十弱冠辰莫言草木委冬雪會應
蘇息遇陽春對酒叙長篇窮途運命委皇
天但願樽中九醞滿莫惜床頭百箇錢直
得優游卒一歲何勞辛苦事百年

松柏篇并序

余患脚上氣四十餘日知舊先借傅玄集
以余病劇遂見還開袞適見樂府詩龜鶴
篇於危病中見長逝詞惻然酸懷抱如此
重病弥時不差呼吸之喘舉目悲矣火藥

間缺而擬之

松栢受命獨歷代長不衰人生浮且脆鴻
若晨風悲東海迸逝川西山導落暉南郊
悅籍短蒿里收永歸諒無疇昔時百病起
盡期志士惜牛刀忍勉自療治傾家行藥
事顛沛去迎醫徒備火石苦奄至不得辭
龜齡安可護岱宗限已迫睿聖不得留為
善何所益捨此赤縣居就彼黃壚宅永離
九原親長與三辰隔屬纊生望盡蓋棺世
業埋事痛存人心恨結亡者懷祖葬既云
及壙隧亦已開室族內外哭親疎同共哀
外姻遠近至名列通夜臺扶輿出殯宮低
迴戀庭室天地有盡期我去無還日居者
今已盡人事從此畢火歇煙既沒形銷聲
亦滅鬼神來依我生人永辭訣大暮杳悠
悠長夜無時節鬱湮重冥下煩冤難具說
安寢委沉冥戀戀念平生事業有餘結刊
述未及成資儲無擔石兒女皆孩嬰一朝
放捨去萬恨纏我情追憶世上事束教已
自拘明發靡怡念夕歸多憂虞撤閑晨迳

流輟宴式酒濡知今暝日苦恨夫尔時娛
遙遙遠民居獨埋深壤中墓前人跡滅冢
上草日豐空牀響鳴蜩高松結悲風長寐
無覺期誰知遊者躬生存處交廣連榻舒
華茵已沒一何苦楛哉不容身昔日平居
時晨夕對六親今日掩柩何一見無諧因
禮席有降殺三齡速迴隙几筵就收撤室
宇改疇昔行女遊歸途仕子復王役家世
本平常獨有亡者劇時祀望歸來四節靜
塋丘孝子撫墳號父子知來不欲還心依

戀欲見絕無由煩冤荒隴側肝心盡崩抽

侍宴覆舟山二首

勅爲柳元景作

息雨清上郊開雲照中縣遊軒越丹居暉
燭集涼殿凌高躋飛楹追焱起流宴桓苑
含靈羣崑庭藏物變明暉爍神都麗氣冠
華甸日遠幽情周醴洽深恩遍繁霜飛玉
闈愛景麗皇州清蹕戒馳路羽蓋佇宣遊
神居既崇盛崑嶮信環周禮俗陶德聲昌
會溢民謳慙無勝化質謬從雲雨浮

登廬山二首

懸裝亂水區薄旅次山楹千巖盛阻積萬
壑勢迴縈巖從高昔兒紛純襲前名洞間
窺地脉聳樹隱天經松磴上迷密雲竇下
縱橫陰冰實夏結交樹信冬榮嘈噴晨鷗
思叫嘯夜猿清深崖伏化迹穹岫閱長靈
乘此樂山性重以遠遊情方躋羽人途永
與煙霧并

訪世失隱淪從山異靈士明發振雲冠升
嶠遠棲趾高岑隔半天長崖斷千里氣霧
承星辰潭壑洞江汜斬絕類席牙噴屹象

熊耳埋冰或百年韜樹必千祀雞鳴清澗
中猿嘯白雲裏瑤波逐穴開霞石觸峰起
迴牙非一形參差反相似傾聽鳳管賓紉
望釣龍子松桂盈膝前如何穢城市

發長松遇雪

出牛既送寒奠陵冥一作陸方浹馳振風搖地
局封雪滿空枝江渠合為陸天野浩無涯
飲兼凍馬骨斲冰傷後疲昆明豈不慘秦
谷寧可吹

蒜山被始興王命作

暮冬霜朔嚴地閉泉不流玄武藏木陰丹
鳥一作還養羞勞農澤既周役車時亦休高
薄苻一作清妙蒨一作藻駕及時遊鹿苑豈淹睇
兔園不足留升嶠眺日軌臨迥望滄洲雲
生玉堂裏風靡銀臺陬陂石類星懸嶼木
似煙浮形勝信天府珍寶麗皇州白日迴
清景芳醴洽歡柔參差出寒吹飈戾江上
謳王德愛文雅飛翰灑鳴球美哉物會昌
衣道服光猷

冬至

舟遷莊甚笑水流孔急難景移風度改日
至晷迴換眇眇負雪鶴皎皎帶霜鴈長河
結蘭紆層冰如玉岸哀哀古老容慘顏愁
歲宴催促時節過逼迫聚離散美人還未
央鳴箏誰與彈

蜀四賢詠

渤渚水浴鳧春山王抵鵲皇漢方盛明羣
龍滿階閣君平因世閑得還守寂寞閑簾
注道德開卦述天爵相如達生旨能屯復
能躍陵令無人事毫墨時灑落褒氣有逸

倫雅績信炳博如令聖納賢金璫易羈絡
良遮神明遊豈伊覃思作玄經不期賞虫
篆散憂樂首路或參差投駕均遠託身表
既非我生內任一作甚豐薄

秋日示休上人

枯桑葉未零疲客心易驚今茲亦何早已
聞絡緯鳴迴風滅且起卷蓬息復征愴愴
簞上寒悽悽帳裏清物色延暮思霜露逼
朝榮臨堂觀秋草東西望楚城百物方蕭
瑟坐歎從此生

和王義興七夕

宵月向掩扉夜霧方當白寒機思孀婦秋
堂泣征客疋命無單年偶影有雙夕暫交
金石心須臾雲雨隔

贈鮑侍郎 釋惠休

玳枝子金英綠葉子紫莖不入君玉杯低
彩還自榮想君不相豔酒上視塵生當令
芳意重無使盛年傾

荅休上人

酒出野田稻菊生高岡草味兒復何竒能

令君傾倒玉腕徒自羞為君愧此秋金蓋
覆牙拌何為心獨愁

和王護軍秋夕

散漫秋雲遠蕭蕭霜月寒驚飈西北起孤
鴈夜往還開軒當戶牖取琴試一彈停歌
不能和終曲久辛酸金氣方勁殺隆陽微
且單泉涸甘井竭節從芳歲殘生事各多
少誰共知易難投章心蘊千里途輕紈
類託孤老暇觴思暫開餐

懷遠人

哀樂生有端離會起無因去事難重念恍
惚似如神屬期眇已遠後遇邈無辰馳風
掃遙路輕蘿含夕塵思君成首疾欲息眉
不伸

春羈

征人歎道避去鄉悵路邇佳期每無從淮
陽非尺咫春日起游心勞情出從倚岫遠
雲煙綿綿谷屈泉靡迤風起花四散露濃條
旖旎暄妍正在茲摧抑多嗟思嘶聲名邊
豎豈我箱中紙染翰餉君琴新聲憶解子

三日

氣暄動思心柳青起春懷時豔憐花藥服
淨俛登臺提觴野中飲心愛煙未開露色
染春草泉源潔冰苔泥泥濡露條嫋嫋承
風栽鳧鷖掇苦薺黃鳥銜櫻梅解衿欣景
預臨流競覆盃美人竟何在浮心空自摧

苦雨

連陰積澆灌滂沱下霖亂沉雲日夕昏驟
雨望朝旦蹊澗走獸稀林寒鳥飛宴密霧
冥下溪聚雲屯高岸野雀無所依羣雞聚
空館川梁日已廣懷人邈渺漫徒酌相思
酒空急促明彈

三日游南苑

採性及華月追節逐芳雲勝藉溢林疎麗
日華山文清潭圓翠會化薄綠綺紋合樽
遽景斜折榮老組芬

歲暮悲

霜露迭濡潤草木互榮落日夜改運周今
悲復如昨晝色苦沉陰白雪夜迴薄皦潔
冒霜鴈飄揚出風鶴天寒多顏苦妍容逐

丹壑係冒千里心獨宿之然諾歲暮美人
遠寒壺與誰酌

園中秋散

負疾固無豫晨衿悵已單氣交蓬門疎風
數園草殘荒墟半晚色幽庭憐夕寒既悲
月尸清復切夜蟲酸流枕商聲苦騷殺年
志闌臨歌不知調發興誰與歡儻結延上
清豈孤林下彈

詠秋

秋蘭徒晚綠流風漸不親飈我垂思暮驚

此梁上塵沉陰安可久豔景將遂淪何由
忽靈化暫見別離人

秋夕

慮涕擁心用夜默發思機幽閨溢涼吹閑
庭滿清暉紫蘭花已歇青梧葉方稀江上
淒海戾漢曲驚朔霏髮班悟壯晚物謝知
歲微臨宵嗟獨對撫賞怨情違躊躇空明
月惆悵徒深帷

望水

刷鬢垂秋日登高觀水長千澗無別源萬

壑共一廣流缺巨石轉湍迴急沫上苔苔
嶺岸高照照寒洲爽東歸難忖測日世誰
予賞臨川憶古事日孱千載想河伯自矜
大海若沉渺莽

詠白雪

白珪誠自白不如雪光妍工隨物動氣能
逐勢方圓無妨玉顏媚不奪素繒鮮投心
障苦節隱迹避榮年蘭焚石既斷何用恃
芳堅

鮑氏集卷第八

鮑氏集卷第九

爲柳令謝驃騎表

解褐謝侍郎表

謝秣陵令表

時為中書舍人

謝賜藥啟

謝永安令解禁止啟

論國制啟

謝上除啟

通世子自解

重與世子啟

謝假啟二首

侍郎上疏

謝解禁止

侍郎滿辭閣

轉常侍上疏

征北世子誕育上疏

謝隨恩被原表

皇孫誕育上疏

登大雷岸與妹書

為柳令謝驃騎表

臣言伏承詔書加臣驃騎將軍餘如故顧
循空薄屢墜成命仰當天寵伏抱慙灼臣
素陋人本絕分望適野謝山川之志輟耕
無鴻鵠之歎官希鄉部富期農牧夙當昌
朝早值恩洽天網紛橫皇曆歸聖左輪不
殷良馬未汗功半下列爵超上賞奮迹騰
光參駕龍服翰起雲飛拂翼虹路雖曩之
脫駕拖紫捨檐丹轂方之微臣彼安足齒
齊此而歸懼塵玉度况遂頻煩重彰濫越
伏願天德曲成資始令終雨露之惠自華

及殞特屈慈獎降申愚固則綢繆之施復
踰造物不勝感躍惶駭之情謹拜表以聞

解褐謝侍郎表

臣照言臣孤門賤生操無炯迹鶉棲草澤
情不及官不悟天明廣矚騰滯援沉觀光
幽節聞道朝年榮多身限思非終報臣云云

謝秣陵令表

時為中書舍人

臣照言即日被尚書召以臣為秣陵令臣
負插下農執羈末皂情有局塗志無建立
溝命逢天得汗官牒不悟思澤無窮謬當

獎試用謝刀筆猥承宰職豈是闔儒所能
克任今便祇召違離省闈係戀罔極不勝
下情謹拜表以聞

謝賜藥啟

臣衛躬不謹養命無術情淪五難妙謝九
法飈落先傷衰病早及遐近臨猥委存
卹疾同山岳蒙靈藥之賜惠非河間謬仙
使之屈恩逾脯糗惠重惟席荷對銜慙伏
抱衿渥

謝永安令解禁止啟

臣田茅下第質非謝品志終回民希絕三
仕邀世逢辰謬及推擇恩成曲積榮秩兼
過雖誓接纖生昊天罔極迄無大馬孤慙
星歲加以淪節雪飈沉誠款晦值天光燭
幽神照廣察深豐從宥與物更稟遂晞曬
陽春湔汰秋水綴翼雲條葺鮮洪沼洗膽
明目扞手太平重甄再造含氣孰比不悟
乾陶弥運復垂埏飾矯迹升等改觀非服
振纓珥筆聯承貴寵豈臣浮朽所可恭從
實非愚瞢所宜循踐瑣族易灰脆漏已迫
空荷載燾終貴仰復飲冰肅事懷火畢命
不勝屏營之情謹啟事以聞

論國制啟

臣啟臣聞尺之量錦工者裁之袞丈之木
繩墨左焉事無巨細非法不行當今世問
政睦藩國相望君舉必書動成准式息躬
聖壤十有餘載條制節文宜其備矣諸王
列封動靜兼該而竊見國之處事未盡善
臣之暗蔽私心有惜伏見彭城國舊制猶
有數卷雖多殊革大綱可依愚謂宜令掌

固刊而撰之上著朝典藩邦之度下揆國
訓繁簡之誼傍酌州府寬猛之中章程久
具永為恒制豈伊今美乃足貴之將來臣
忝充直員脫以啟聞煩而非要伏追慙悚
謹啟

謝上除啟

臣言被宣賜臣上除臣伏事日淺蒙荷已
豐天澤所及且喜且懼但臣自丁常桓來
塗階級非所敢冀今日榮顛直尔不少冒
乞停不止除伏顛重許干穢悚息

通世子自解

僕以常桓無用於世遭逢謬幸被受恩榮
誠顛論畢久宜捐落仁眷篤終復獲淹停
感今惟昔銜佩無已但自無堪尸素累載
腹心之愧寤寐為憂令請解所職顛蒙矜
許自奉清塵于茲六祀墜辰永往遺恩在
心執紙哽咽言不自宣

重與世子啟

奉還誨深承殷勤篤眷之重披讀未終悲
愧交集僕以常人所蒙隆厚久應知退非

適今日銜恩戀德用缺進心今者之請必
願鑒許且僕棲遲無事咫尺館第食稟風
微非旦則夕居職還私兩者無異而於僕
無用有以自處豈非仁念始終之惠重致
于日弥深慙感

謝假啟二首

臣啟臣居家之治上漏下濕暑雨將降有
懼崩壓比欲完葺私寡功力板插綯塗必
須躬後冒欲請假三十日伏願天恩賜垂
矜許干啟復追悚息謹啟

臣啟臣所患弥留病顛沉痾自近蒙歸頻
更頓處日夜間困或數四委然一弊瞻景
待化加以凶衰嬰溝慘悼終鮮兄弟仲由
所哀臣實百罹孤苦夙丁天倫同氣實惟
一妹存沒永訣不獲訃見封瘞泉壤臨送
私懷感恨情痛兼深臣母年老經離憂傷
服麁食淡羸耗增疾心計焦迫進退罔躡
冒乞申假百日伏願天慈賜垂矜許臣違
福履身事屯悴歎息和景掩淚春風執啟
涕結伏追惶悚謹啟

侍郎上疏

臣言臣北州衰淪身地孤賤衆善必達百行無一生丁昌運自比人曹操之端槩業謝成迹徂年空往瑣心靡述攄轡投簪於斯終志東萊負薪期與相畢安此定之命忝彼公朝不悟乾羅廣收圓明兼覽雕瓠飾笙備雲和之品潢汙流藻充金鼎之實鍛羽暴鱗復見翻躍枯楊寒炭遂起煙華未識微躬猥能及此未知陋生何以為報祇奉恩命憂愧增灼不勝感荷屏營之情

謹詣閣拜疏以聞

謝解禁止

臣言被宣令解臣禁止天光鄭重不可勝逢飛走知感矧臣人類臣聞獲過于神或憑尸祝以請得罪於君可因左右而謝臣自惟孤賤盜幸榮級閣澁大誼猖狂世禮竒非阮籍無保持之助才愧馮衍有輶輳之困自非聖朝超然覽臣於視聽之外則今日渥澤更成妄遭來辰萎葉終先朝草小人歲暮知能何報徒厚恩華憂懼歎息

不任下情謹詣拜疏以聞

侍郎滿辭閣

臣言臣所居職限滿今便收迹金閨雲路
從茲自遠鮪鯨沉藏方絕光景祇戀遲迴
結涕濡泗臣噐机窮賤情嗜躑昧身弱涓
毫地幽并谷本應守業墾畷剝苻牧雞圈
豕以給征賦而幼性猖狂因頑慕勇釋擔
受書廢耕學文畫席既敗學步無成反拙
歸跂還陋鷲雀日宴途遠塊然自喪加以
無良根孤伎薄既同馮衍負困之累復抱

相如瘠渴之疾志逐軍離事與衰合束馬
埋輪絕遊息世宿福餘慶爰邁聖明煦蒸
霜霰葶申雲落得從下走叨迹人行操勒
負羈班榮扈隸矜愚訓短袞宥弗及奉此
而歸足以沒齒雖摩肌髮無報天德更冀
營魂逮能結草不勝感戀之情謹詣闕拜
疏奉辭以聞

轉常侍上疏

臣言即日被中曹板轉臣爲左常侍臣自
惟常人觸事無可謬被拔擢實爲光榮臣

既無髣髴上報殊絕之恩有分每豐其過
前後輕重輒得原恕獎以君子之方赦其
不閑教訓大愆不責於澤必加是臣所以
夙夜自念知遭遇之至深至厚也未冀未
望便荷今榮欣喜感悅不敢僞讓庶保終
始身命為初不勝下情謹詣閣拜疏謝以
聞

征北世子誕育上疏

臣等言臣聞本枝無疆布諸前典衆多弥
貴信之華封故德積則慶深業昌則祚廣
伏承王子以中氣正月鍾靈納和誕躬紫
閣膺祚朱紱弧矢夙陳珪璋攸覲雲光麗
輝巖澤昭采嘉祥爰孚柔顏載睟凡在氓
隸莫不抃悅臣霑恩踰物慶倍自中不勝
殊歡溢喜謹奉表以聞

謝隨恩被原表

臣言即日被曹宣命元統內外五刑以下
浩澤盪汰臣亦預焉得從漢律故謬之辨
闇遭周典肆眚之科大喜卒至非願所圖
魚愕鷄睨且悚且慙臣誠下愚不達義方

然君尊臣泰豈同大馬且常侍臣淵穆疏
草即臣所作助人爲恭猶加敬憶自己率
禮寧敢慢忘由臣悴賤可悔可誣曾參殺
人臣豈無過寢病幽栖無援朝列身孤節
畧易成論破幸大明臨下仁道毓物澤洎
翔走臣覃末慶然古人有言楊者易生之
木也一人植之十人拔之無生楊矣何則
植之者難拔之者易況臣一植之功不立
衆拔之過屢至同彼風霜異此貞脆書稱
天秩有禮易載神福在謙臣之謙禮理謝
福秩仰銜俯媿行歎坐戚即欲奠沛拜恩
下庭但臣病又柴羸不堪冒涉小得趨馳
星駕登路不勝荷佩之誠謹上疏以聞

皇孫誕育上疏

兼郎中令侍郎臣等言伏承東儲積慶皇
孫誕育國啟昌期民迎福運臺禁稱祉井
廬相賀伏惟聖懷載深鴻念不任下情謹
詣閣上疏以聞

登大雷岸與妹書

吾自發寒雨全行日少加秋潦浩汗山溪

猥至渡沂無邊險徑遊棧石星飯結荷衣
水宿旅客貧辛波路壯闊始以今日食時
僅及大雷塗登千里日踰十晨嚴風慘節
悲風斷肌去親為客如何如何向因涉頓
憑觀川陸遨神清渚流涕方曛東顧三洲
之隔西眺九派之分窺地門之絕景望天
際之孤雲長圖大念隱心者久矣南則積
山萬狀爭氣負高含霞飲景參差代雄凌
跨長隴前後相屬帶天有西橫地無窮東
則砥原遠隰亡端靡際寒蓬夕卷古樹雲

平旋風四起思鳥羣歸靜聽無聞極視不
見北則陂池潛演湖脉通連苧蒿攸積菰
蘆所繁栖波之鳥水化之蟲智吞愚彊捕
小號噪驚聒紛乎其中西則回江永指長
波天合滔滔何窮漫漫安竭創古迄今舳
艫相接思盡波濤悲滿潭壑煙歸八表終
爲野塵而是注集長寫不測脩靈浩盪知
其何故哉西南望廬山又特驚異基墜江
潮峰與辰漢連接上常積雲霞雕錦褥若
華夕曜巖澤氣通傳明散綵赫似絳天

左右青靄表裏紫霄從嶺而上氣甚金光
半山以下純爲黛色信可以神居帝郊
鎮控湘漢者也若深洞所積溪壑所射鼓
怒之所衝擊涌復之所宕滌則上窮荻浦
下至豨洲南薄鷺爪北極雷澗削長埤短
可數百里中騰波觸天高浪灌日吞吐百
川寫泄萬壑輕煙不流華鼎振沓弱草朱
靡洪漣隴感散渙長驚電透箭疾穹溘崩
聚坻飛嶺覆回沫冠山奔濤空谷礧石為
之摧碎倚岸為之整落仰視大火俯聽波

聲愁魄脅息心驚慄矣至於繁化殊育詭
質怪章則有江鵝海鴨魚鮫水席之類豚
首象鼻芒鬚針尾之族石蟹土蚌燕箕雀
蛤之疇折甲曲牙逆鱗返舌之屬掩沙漲
被草渚浴雨排風吹滂弄翮夕景欲沉曉
霧將合孤雛寒嘯遊鴻遠吟樵蘇一歎舟
子再泣誠足悲憂不可說也風久雷颺夜戒
前路下弦內外望遠所屆寒暑難適汝專自
慎夙夜戒護勿我爲念恐欲知之聊書所覩
臨塗草感辭意不周

鮑氏集卷第九

鮑氏集卷第十

河清頌并序

佛影頌

凌煙樓銘并序

藥奩銘

飛白書勢銘

石帆銘

瓜步山揭文

河清頌并序

臣聞善談天者必徵像於人工言古者先

考續於今鴻羲以降遐哉邈乎鏤山岳雕
篆素昭德垂勳可謂多矣而史編唐堯之
功載格于上下樂登文王之操稱於昭于
天素孤玄玉聿彰符命朴牛大螭爰定祥
曆魚鳥動色禾雉興讓皆物不盈皆而美
溢金石頌聲為之而寢詩人於是不作庸
非惑歟自我皇宋之承天命也仰應龍木
之精俯協龜水之靈君圖帝寶粲爛瑰英
固以業光曩代事華前德矣聖上天飛踐
極迄茲二十有四載道化周流玄澤汪濊

地平天成含生阜熙文同軌通表裏釐福
曜德中區黎庶知讓觀英遐外夷貊懷惠
秩禮恤勤散露臺之金賑民舒國傾御邛
之粟約違迫脅奢去甚泰譙無畱飲畋不
盤樂物色異人優游鯁直顯靡失心幽無
怨魄精炤日月事洞天情故不勞仗斧之
使號令不肅而自嚴無辱鳳舉之事靈恠
不召而自彰萬里神行颯塵不起農商野
廬邊城偃柝冀馬南金填委內府馴象栖
爵充羅外苑阿紈纂組之饒衣覆宗國魚

鹽杞存之利傍贍荒遐士民殷富繁軼五陵宮宇宏麗崇冠三川閭閻有盈歌吹無絕朱輪疊轍華冕重肩豈徒世無窮人民獲休息朝呼韓罷酤鐵而已哉是以嘉祥累仍福應尤盛青丘之狐丹穴之鳥栖阿閣遊禁園金芝九莖木禾六秀銅池發膏卣宜以謁薦郊廟和協律呂煙霏霧集不可勝紀然而聖上猶夙興昧旦若有望而未至宏規遠圖如有追而莫及神明之貺推而弗居也是以琬碑鏐檢盛典蕪而不

治朝神省方大化抑而未許崇文協律之士蘊儻頌於外坐朝陪宴之臣懷揄揚於內三靈佇睠九壤注心既有日矣歲宮乾維月遭蒼陸長河巨濟異源同清澄波萬壑潔瀾千里斯誠曠世偉觀昭啟皇明者也語曰影從表瑞從德此其效焉宣尼稱鳳鳥不至河不出圖傳曰俟河之清人壽幾何皆傷不可見者也然則古人所不見者今殫見之矣孟軻曰千載一聖是旦暮也豈不信哉夫四皇六帝樹聲長世大寶

也澤浸羣生國富刑清鴻德也制禮裁樂
博風遷俗文教也誅筮羯黠東顧象闕武
功也鳴禽躍魚滌穢河渠至祥也大寶鴻
德文教武功其崇如此幽明同贊民祇與
能厥應如彼唯天為大堯實則之皇哉唐
哉疇與為抑又聞之勢之所覃者淺則美
之所傳者近道之所感者深則慶之所流
者遠是以豐功躋命潤色騰榮盛德形容
藻被歌頌察之上代則奚斯吉甫之徒鳴
玉鑿於前視之中古則相如王褒之屬馳

金羈於後絕景揚光清埃繼路故班固稱
漢成之世奏御者千有餘篇文章之盛與
三代同風由是言之斯迺臣子舊職國家
通議不可輟也臣雖不敏敢不勉乎乃作
頌曰

窺刊崩石据逸殘竹巢風寂寥羲埃綿邈
鉅生大年瞻學淵聞鞏繡成景粉績顙軒
徒翫井科未覩天河亘古通今明鮮晦多
千齡一見書史登歌旋我皇駕揆景方塗
凌周躡殷蹶唐轢虞如彼七緯累壁重珠

高祖撥亂首物定靈更開天地再鑄羣坐
帝御三傑龍步八垓朔南暨教海北騰聲
淪深格高浹遐洞冥龜鼎遷宋玄圭告成
大明方微鴻光中微聖命誰堪皇曆攸歸
謀從筮協神與民推黃旗西映紫蓋東輝
納瑞螭玉升政衡機金輪豹飾珠冕龍衣
正位北辰垂拱南面天下何思日用罔倦
復禮歸仁觀恒通變一物有違戚言毀膳
菲躬簡法厚下安宅謙德弘光損道滋益
孝崇饗祀勤隆耕籍饋酎秋羊封瑾春骼

嬰耄兼梁鰥孤重帛體由學染俗以教遷
禮導刑清樂鬯風宣分衢讓齒折訟推田
野旌伏彥朝賞登賢儒訓優柔武節焮鷲
文憲精弘戎容犀利樞鈐明審程獲周備
吏礪平端民羞幸覲桴鼓凝埃烽驛垂轡
銷我長劔歸為農器閩外水鄉鄣表交國
隴首西南激尾東北赭赭嶺丹渾渾泉黑
移琛雲勉轉隼邛熨狼歌薦功烏譚陳德
治博化光民阜財盛班白行謠青綺高詠
雲表幽和物章明慶麗植雕質蠢行藻性

仁草晨葇德宿宵映海無隱颺山有黃落
牛羊內首閤戶外拓瑞木朋生祥禽輩作
薰風蕩閨飴露流閣器軌神妙劑調象藥
匪直也斯偉慶方溱注彼四瀆媚此雙川
伏靈遙紀閔貺遐年澄波崑岳鏡流蕊山
泉室凝澱水府清消俛瞰夷都降眡驪淵
朱宮潛耀紫閣陰鮮昔在爽德王風不昌
迺溢迺竭或壅或亡絜源濫壑曾是未央
先民永慨大道悠長云何其實鍾我皇聞
諸師說天踈聽密分介焉如響匪遠惟疾

矧是皇心妙夫貞一左右天經戶牖人術
訐謨布簡絲言盈室穢有綿祀清豈崇日
一人之慶吹萬稟和靈根方固脩源重波
副睿貳哲帝體皇柯景雲蔚岳秀星駢羅
垂光九野騰響四遐輔車鼎足槃石席牙
世疋周室基永漢家泰階既平洪河既清
大人在上區宇文明樵夫議道漁父濯纓
臣照作頌鋪德樹聲

佛影頌

形生麤怪神照潭寂驗幽以明考心者迹

六塵煩苦五道綿劇乃炳舟梁爰悟淪溺
色丹兒績留相瓊石金光絕見玉毫遺覲
俾昏作朗効順去逆

凌煙樓銘并序宋臨川王起

臣聞憑颯薦響唱微効長垂一作乘波鑿景功
少致深是以冰臺築乎魏邑鳳閣起於漢
京皆所以贊生通志感悅幽情者也伏見
所製凌煙樓棲置崇迥延瞰平寂即秀神
臯因基地勢東臨吳甸西眺楚關奔江永
寫鱗嶺相葺重樹窮天通原盡自悲積陳

古賞絕舊年誠可以暉曠高明藻撤遠心
矣夫識緣感傾事待言彰匪言匪述綿世
罔傳敢作銘曰

巖巖崇樓藐藐層隅階基天削戶牖雲
區瞰江列楹望景延除積清風露合一作含綵
煙塗俯窺淮海俛眺荆吳我王結駕藻思
神居宜此萬春脩靈所扶

藥奩銘

歲霄走九生馱墮墻時無驟得年有遐方
水玉出煙靈飛神靈生光龜文電衣龍綵

雲裳九芝八石延正盪斜二脂六體振衰
返華毛姬餌葉鳳子藏花景絕翠虬氣隱
頽霞深神罕別妙竒不揚或繁席杖或亂
蝨床故不世不可以服未達不可以嘗眩
精逆目是乃為良

飛白書勢銘

秋毫精勁霜素凝鮮霑此瑤波染彼松煙
超工八法盡竒六文鳥企龍躍珠解泉分
輕如游霧重似崩雲絕鋒劒摧驚勢箭飛
差池驚起振迅鴻歸臨危制節中險騰機

珪角星芒明麗爛逸絲縈髮垂平理端密
盈尺錦兩片字全溢故仙芝煩弱既匪足
雙蟲席瑣碎又安能匹君子品之是最神筆

石帆銘

應風剖流息石橫波下凜地紉上獨星羅
吐湘引漢歛螭吞沱西歷岷冢北瀉淮河
眇森弘藹積廣連深淪天測際巨海窮陰
雲族未起風柯不吟崩濤山墜鬱浪雷沉
在昔鴻荒刊啟源陸表裏民邦經緯鳥服
瞻貞視晦坎水巽木乃刻乃鏟既刻既斲

飛深浮遠巢潭館谷涉川之利謂易則難
臨淵之戒曰危乃安泊潛輕濟冥表勤言
穆我戒逐留御不還徒悲猿鵠空駕滄煙
君子彼想祇心載惕林簡松括水採龍鷓
覘氣涉潮投祭涵壁揆檢舍圖命辰定歷
靖席口周王夙趨九折羊腸漢惡電驅
潛鱗浮翼爭景乘虛衡石頰鯨帝子察殂
青山斷河后父沉軀川吏掌津敢告訪途
瓜步山揭文
歲含龍紀月巡鳥張鮑子辭吳客楚指充

歸揚道出關津升高問途北眺羶鄉南矚
炎國分風代川揆氣閩澤西睨天宮窮曜
星絡東窺海門候景落日遊精八表駛視
四遐超然永念意類交橫信哉古人有數
寸之籥持千鈞之關非有其才施處勢要
也瓜步山者亦江中眇小山也徒以因迫
爲高據絕作雄而凌清瞰遠擅竒含秀是
亦居勢使之然也故才之多少不如勢之
多少遠矣仰望穹垂俯視地域涕洟江河
疵贅丘岳雖奮風漂石驚電剖山地綸維

陷川鬪毀宮豪盈髮虛曾未注言況乎汎
河浮海之高遺金椎壁之竒四遷八聘之
策三黜五逐之疵販交買名之薄吮癰舐
痔之界安足議其是非

鮑氏集卷第十

平江若邨沈炳元抄藏

此影宋鈔本鮑氏集與余所藏本同內缺兩半葉倩
澗翁影寫補入適五硯樓主人見之謂余有一本在
可無需此遂以五硯樓藏影宋鈔乾道臨安志三
卷相易蓋鮑集則余所羨者周志則余所闕而可
以配宋刻潛志者彼此各得想綬堦必不以余為
強奪也已 庚申秋九月晦日 菟圃黃丕烈



